

Bosna i Hercegovina
Federacija Bosne i Hercegovine
KANTON SARAJEVO
OPĆINA VOGOŠĆA
OPĆINSKI NAČELNIK

Broj: 03-12- 476/26
Vogošća, 18.03.2026. godine

**OPĆINSKO VIJEĆE
VOGOŠĆA**

PREDLAGAČ: Općinski načelnik

OBRADIVAČ: Služba za privredu, integrisani lokalni razvoj i društvene djelatnosti

PREDMET: Odluka o visini komunalnih taksi na području Općine Vogošća

Dostavljamo Vam na razmatranje i usvajanje Odluku o visini komunalnih taksi na području Općine Vogošća

OPĆINSKI NAČELNIK

Migdad Hasanović

Na osnovu člana 6. Zakona o komunalnim taksama („Službene novine Kantona Sarajevo“, br. 8/22), člana 8. stav 3. alineja 20., člana 13. stav 2. alineja 4. i člana 36. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, br. 49/06 i 51/09) i člana 70. stav 1. tačka 2. Statuta Općine Vogošća („Službene novine Kantona Sarajevo“ broj 27/14 - prečišćeni tekst 14/15, 9/20, 23/24), Općinsko vijeće Vogošća, na sjednici održanoj _____ donijelo je

- P r i j e d l o g -

ODLUKU

o visini komunalnih taksi na području općine Vogošća

I OPĆE ODREDBE

Član 1. (Predmet)

Ovom Odlukom propisuju se način utvrđivanja kriterija i visina komunalnih taksi (u daljem tekstu: taksa), vrsta, rokovi, način plaćanja i oslobađanje od plaćanja takse te otpis i povrat takse, na području općine Vogošća (u daljem tekstu: Općina) u skladu sa Zakonom o komunalnim taksama („Službene novine Kantona Sarajevo“, br. 8/22) (u daljem tekstu: Zakon).

Član 2. (Definicije pojmova)

Definicije pojmova u smislu ove Odluke su:

- a) držanje sredstava za igru (bilijar, automati, fliperi, video igre, pikado, aparati za posebne igre na sreću i sl.) podrazumijeva svaki uređaj kojim se naplaćuje provedeno vrijeme jednog ili više konzumenata takvih uređaja;
- b) poslovni prostor u kojem se priređuju klasične igre na sreću i posebne igre na sreću podrazumijeva svaki prostor u kojem se priređuju klasične igre na sreću i/ili posebne igre na sreću;
- c) držanje i izvođenje muzike uživo u ugostiteljskim objektima podrazumijeva povremeno ili svakodnevno izvođenje muzičkog programa (muzika uživo) uz pružanje ugostiteljskih usluga;
- d) isticanje objava, oglasa i saopćenja podrazumijeva postavljanje stalnih ili privremenih banera, plakata, panoa, na javnim mjestima u štampanoj ili elektronskoj formi, što podrazumijeva i reklamiranje brendova, proizvoda ili usluga koje pružaju pravna ili fizička lica, ili koje imaju svrhu putokaza prema mjestu sjedišta sponzora koji ih je postavio;
- e) svako korištenje prostora na mjestima za kampove (šatore, prikolice i motorna vozila svih kategorija) podrazumijeva zauzimanje prostora za privremeni boravak od strane jedne ili više osoba;
- f) postavljanje uređaja za isplatu i naplatu gotovine, (bankomata) podrazumijeva svako zauzimanje površine radi postavljanja i instaliranja ovakvih uređaja u svrhu pružanja usluga prema konzumentima;
- g) postavljanje svih drugih uređaja koji putem automatske obrade podataka naplaćuju usluge gotovinom, karticama za naplatu, ili posredstvom telekom operatera (kafemati, parkomati i sl.). U ovom slučaju se podrazumijeva postavljanje navedenih uređaja koji automatskom obradom podataka obračunavaju i naplaćuju razne vrste usluga bez osobnog posredovanja konzumenta sa pružaocem usluga koji može biti registriran kao fizička ili pravna osoba.

Član 3.

(Vrste taksi)

Takse se naplaćuju za:

- a) držanje sredstava za igru i igre na sreću (bilijar, automati, fliperi, video igre, pikado i aparati za posebne igre na sreću);
- b) poslovni prostor u kojem se priređuju klasične igre na sreću i posebne igre na sreću koje su definisane odredbama Zakona o igrama na sreću („Službene novine Federacije BiH“ broj: 48/15 i 60/15) i njegovim eventualnim izmjenama i dopunama;
- c) držanje i izvođenje muzike uživo u ugostiteljskim objektima;
- d) isticanje objava, oglasa i saopćenja na javnim mjestima;
- e) korištenje prostora na javnim mjestima za kampove (šatore, prikolice, motorna vozila svih kategorija);
- f) postavljanje uređaja za isplatu i naplatu gotovine (bankomata) i
- g) postavljanje svih drugih uređaja koji putem automatske obrade podataka naplaćuju usluge gotovinom, karticama za naplatu ili posredstvom telekom operatera (kafemati, parkomati i sl.).

Član 4.

(Obveznici plaćanja takse)

- (1) Takseni obveznici su lica koja su korisnici prava na postavljanje, držanje i korištenje uređaja, predmeta i dr. ili prava na korištenje prostora na području Općine, a za čije postavljanje, držanje i korištenje je propisano plaćanje takse ovom Odlukom.
- (2) Ako za istu taksu postoje dva ili više obveznika, njihova obveza je solidarna.
- (3) Taksena obaveza nastaje danom početka korištenja prava iz stava (1) ovog člana.

Član 5.

(Pripadnost i uplata takse)

- (1) Takse su prihod Općine Vogošća.
- (2) Takse se uplaćuju na depozitni račun Općine otvoren kod poslovne banke.
- (3) U nalogu za plaćanje takse obavezno se upisuje šifra općine 080, sa naznakom vrste prihoda 722321 – općinske komunalne takse.

II TARIFA KOMUNALNIH TAKSI

Član 6.

Tarifni broj 1.

- (1) Tarifnim brojem 1. utvrđuje se visina komunalne takse za držanje sredstava za igru i igre na sreću (bilijar, automati, fliperi, video igre, pikado i aparati za posebne igre na sreću).
- (2) Komunalna taksa iz stava (1) ovog člana, plaća se godišnje po jednom sredstvu i to kako slijedi:
 - a) bilijar stolovi, automati, fliperi, video igre, pikado i druga sredstva za igre 1.000,00 KM;
 - b) na aparate za posebne igre na sreću koji donose novac 3.000,00KM.

Član 7.

Tarifni broj 2.

- (1) Tarifnim brojem 2. utvrđuje se visina komunalne takse za poslovne prostore u kojima se priređuju klasične igre na sreću i posebne igre na sreću koje su definisane odredbama Zakona o igrama na sreću („Službene novine Federacije BiH, br 48/15 i 60/15) i njegovim eventualnim izmjenama i dopunama.
- (2) Komunalna taksa iz stava (1) ovog člana plaća se jednom godišnje za svaki poslovni prostor u kojem se priređuju klasične igre na sreću i posebne igre na sreću u iznosu od 20.000,00 KM.

Član 8.
Tarifni broj 3.

- (1) Tarifnim brojem 3. utvrđuje se visina komunalne takse za izvođenje muzike uživo u ugostiteljskim objektima.
- (2) Komunalna taksa iz stava (1) ovog člana, plaća se dnevno u iznosu od 100,00 KM.

Član 9.
Tarifni broj 4.

- (1) Tarifnim brojem 4. utvrđuje se visina komunalne takse za isticanje objava, oglasa i saopštenja (plakata i panoa) na javnim mjestima određenim za te namjene.
- (2) Za isticanje banera, plakata, oglasa i drugih sličnih saopćenja na javnim mjestima određenim za te namjene, plaća se jednokratna taksa u iznosu od 3,00 KM dnevno, srazmjerno broju dana isticanja istih, a što se utvrđuje na osnovu rješenja/ugovora kojim je odobreno njihovo isticanje.
- (3) Za isticanje panoa, displeja i sl., plaća se godišnja komunalna taksa, u iznosu od 100,00 KM po 1,00 m², a što se utvrđuje na osnovu rješenja/ugovora kojim je odobreno njihovo isticanje.

Član 10.
Tarifni broj 5.

- (1) Tarifnim brojem 5. utvrđuje se visina komunalne takse za korištenje prostora na javnim mjestima za kampove (šatore, prikolice, motorna vozila svih kategorija), deponije materijala i drugu privremenu uporebu.
- (2) Komunalna taksa iz stava (1) ovog člana, plaća se dnevno za:

a) za svaki šator	2,00 KM
b) za kamp prikolicu	1,00 KM
c) za motorno vozilo	1,00 KM

Član 11.
Tarifni broj 6.

- (1) Tarifnim brojem 6. utvrđuje se visina komunalne takse za postavljanje uređaja za isplatu i naplatu gotovine (bankomata i sl.).
- (2) Komunalna taksa iz stava (1) ovog člana plaća se godišnje po jednom uređaju u iznosu od 700,00 KM.

Član 12.
Tarifni broj 7.

- (1) Tarifnim brojem 7. utvrđuje se visina komunalne takse za postavljanje uređaja koji putem automatske obrade podataka naplaćuje usluge gotovinom, karticama za naplatu ili posredstvom telekom operatera (kafemati, parkomati i sl.).
- (2) Komunalna taksa iz stava (1) ovog člana plaća se godišnje po jednom uređaju u iznosu 300,00 KM.

III. OSLOBAĐANJE OD PLAĆANJA I OTPIS TAKSE

Član 13. (Oslobađanja od plaćanja takse)

Od plaćanja takse oslobođeni su :

- a) institucije Bosne i Hercegovine,
- b) organi, organizacije i javne ustanove Federacije Bosne i Hercegovine, Kantona i općine,
- c) humanitarne i dobrotvorne organizacije iz osnovne djelatnosti,
- d) udruženja koja ne obavljaju privrednu djelatnost,
- e) vojni invalidi od plaćanja takse iz člana 2. stav 1. tačka a) i f) ove Odluke,
- f) lica kojima je rješenjem nadležnog organa priznato svojstvo člana porodice poginulih, umrlih, nestalih i zarobljenih boraca, ratnih vojnih invalida i civilne žrtve rata,
- g) privredna društva za zapošljavanje lica sa invaliditetom
- h) javna preduzeća čiji je osnivač Općina.

Član 14. (Zahtjev za oslobađanje takse)

Zahtjev za oslobađanje od plaćanja takse podnosi se Poreznoj upravi Federacije Bosne i Hercegovine – Kantonalni porezni ured Sarajevo – Porezna ispostava Vogošća (u daljem tekstu: Porezna uprava).

Član 15. (Otpis takse)

- (1) U slučaju smrti taksenog obveznika fizičkog lica i trajnog prestanka obavljanja registrovane djelatnosti iza kojeg nije ostala pokretna i nepokretna imovina iz koje bi se mogla naplatiti taksa, općinsko vijeće Vogošća (u daljem tekstu Općinsko vijeće) na prijedlog Općinskog načelnika Općine Vogošća, (u daljem tekstu : Općinski načelnik), otpisuje taksu.
- (2) Zahtjev za otpis takse Općini podnosi nasljednik taksenog obveznika.

IV. NAČIN PRIJAVE I NAPLATE TAKSE

Član 16. (Prijava na razrez takse)

Takseni obveznici dužni su Poreznoj upravi podnijeti prijavu za razrez takse, te istu platiti na način i u rokovima propisanim odredbama Zakona.

Član 17. (Provođenje postupka naplate takse)

- (1) Ukoliko takseni obveznik u propisanom roku ne uplati taksu, Porezna uprava će u skladu sa Zakonom o poreznoj upravi FBiH ("Službene novine Federacije BiH, broj

33/02, 28/04, 57/09, 40/10, 27/12, 7/13, 71/14, i 91/15) po službenoj dužnosti provesti postupak naplate takse.

- (2) Porezna uprava je dužna Općini dostavljati izvještaj o uplati taksenih obaveza i to dva puta godišnje, za prvu polovinu tekuće godine do 31.07. i za drugu polovinu tekuće godine do 31.01.naredne godine.

V. POVRAT TAKSE

Član 18.

(Povrat pogrešno ili viška uplaćene takse)

- (1) Obveznik od kojeg je taksa i kamata naplaćena, a koju nije bio dužan platiti ili je više uplatio, ima pravo na povrat.
- (2) Zahtjev za povrat se podnosi Poreznoj upravi koja je nadležna za utvrđivanje takse.
- (3) Porezna uprava je dužna da u roku od 20 (dvadeset) dana odluči o zahtjevu.

Član 19.

(Primjena drugih propisa)

U dijelu razreza takse, naplate, zastare, povrata, kamata i ostalih poslova vezanih za taksu koji nisu regulisani Zakonom o komunalnim taksama („Službene novine Kantona Sarajevo“, broj 8/22) i ovom Odlukom, primjenjivat će se odredbe Zakona o poreznoj upravi Federacije Bosne i Hercegovine („Službene novine Federacije BiH, broj 33/02, 28/04, 57/09, 40/10, 27/12, 7/13, 71/14, i 91/15) i Zakona o upravnom postupku („Službene novine Federacije BiH“, br. 2/98, 48/99, i 61/22).

VI. NADZOR I PROVOĐENJE

Član 20.

(Nadzor i kontrola)

- (1) Nadzor i kontrolu prijava, obračuna i plaćanja komunalne takse vrši Porezna uprava FBiH i nadležni organ jedinice lokalne samouprave, svako u okviru svojih nadležnosti.
- (2) Služba za budžet i finansije Općine, dužna je da redovno dostavlja evidenciju uplata po osnovu komunalne takse Službi za privredu, integrisani lokalni razvoj i društvene djelatnosti.

Član 21.

(Provođenje)

Za provođenje ove Odluke zadužuje se Porezna uprava.

VII. PRELAZNE I ZAVRŠNE ODREDBE

Član 22.

(Taksene obaveze do stupanja na snagu ove Odluke)

Obaveze koje su nastale do dana stupanja na snagu ove Odluke, izvršit će se u skladu sa odredbama ove Odluke.

Član 23.

(Stupanje na snagu)

Ova Odluka stupa na snagu narednog dana od dana objavljivanja u "Službenim novinama Kantona Sarajevo".

Broj: _____/26
Vogošća, _____ 2026. godine

**PREDSJEDAVAJUĆI
OPĆINSKOG VIJEĆA VOGOŠĆA**

Nihad Hadžić

O b r a z l o ž e n j e

PRAVNI OSNOV

Pravni osnov za donošenje Odluke o visini komunalnih taksi na području Općine Vogošća sadržan je u odredbama člana 6. Zakona o komunalnim taksama („Službene novine Kantona Sarajevo“, broj: 8/22) donesenim od strane Skupštine Kantona Sarajevo, kojim je propisano da će Općinsko vijeće svojom odlukom utvrditi kriterije i visinu komunalne takse za obveznike koji su registrovani i/ili posluju na području općine. Također, odredbama Zakona o komunalnim taksama propisano je da će Općinsko vijeće utvrditi vrste, rokove, način plaćanja i oslobađanja od plaćanja taksi.

Odredbama člana 8. stav 3. alineja 20. Zakona o principima lokalne samouprave u Federaciji Bosne i Hercegovine („Službene novine Federacije BiH, broj 49/06 i 51/09), propisana je nadležnost jedinica lokalne samouprave za donošenje propisa o porezima, naknadama, doprinosima i taksama. Istim Zakonom u članu 13. stav 2. alineja 4. propisano je da je organ odlučivanja jedinice lokalne samouprave općinsko vijeće u općini, koje u okviru svojih nadležnosti donosi propise o porezima, taksama, naknadama i doprinosima jedinice lokalne samouprave u skladu sa zakonom.

Članom 36. navedenog zakona propisano je da u zakonom propisanim okvirima, jedinice lokalne samouprave donose propise o naknadama i taksama, kao i provedene propise o oporezivanju.

Članom 70. Stav 1. Tačka 2. Statuta Općine Vogošća („Službene novine Kantona Sarajevo“, broj: 27/14 – prečišćen tekst, 14/15, 9/20 i 23/24), utvrđene su nadležnosti Općinskog vijeća i to da donosi odluke i druge propise i opće akte i daje njihovo tumačenje.

RAZLOZI ZA DONOŠENJE ODLUKE

Obaveza plaćanja komunalne takse u Kantonu Sarajevo utvrđena je Zakonom o komunalnim taksama („Službene novine Kantona Sarajevo“, broj: 8/22). Članom 6. navedenog Zakona utvrđeno je da će Općinsko vijeće svojom odlukom utvrditi kriterije i visinu takse za obveznike koji su registrovani i /ili posluju na području općine, te da će se istom odlukom utvrditi vrsta, rokovi, način plaćanja i oslobađanja od plaćanja takse.

Na osnovu citiranog člana Zakona, Općinsko vijeće Vogošća donijelo je Odluku o visini komunalnih taksi na području Općine Vogošća („Službene novine Kantona Sarajevo“ broj: 15/22), kojom su regulisani način utvrđivanja kriterija i visina komunalne takse, vrsta, rokovi, način plaćanja i oslobađanja od plaćanja takse te otpis i povrat takse, na području Općine Vogošća.

Ustavni sud Federacije Bosne i Hercegovine je, na sjednici održanoj dana 09.04.2025. godine, a odlučujući o zahtjevu zamjenika premijera Federacije Bosne i Hercegovine Tonija Kraljevića, za davanje Mišljenja u vezi sa primjenom stavova ustavnog suda Federacije Bosne i Hercegovine, utvrđenih u presudama tog suda u odnosu na komunalne takse/naknade na istaknutu firmu, u smislu člana IV. B.3.7.d. (III) Ustava Federacije Bosne i Hercegovine, donio mišljenje broj: U-6/25 od 09.04.2025. godine, koje je dana 07.05.2025. godine, objavljeno u „Službenim novinama Federacije BiH“, broj: 33/25.

U izreci naprijed navedenog mišljenja je, između ostalog, utvrđeno da u skladu sa konačnim i obavezujućim odlukama Ustavnog suda Federacije Bosne i Hercegovine, obaveza plaćanja komunalne takse/naknade na istaknutu firmu nije u skladu sa Ustavom Federacije Bosne i Hercegovine te da su, shodno tome, od dana objave ovog Mišljenja u Službenim novinama Federacije BiH, kantonalne skupštine, gradska i općinska vijeća na teritoriji Federacije BiH, koja propisuju obavezu plaćanja komunalne taks/naknade za isticanje firme, dužni postupiti u skladu sa ovim Mišljenjem, odnosno u razumnom roku iz svojih propisa ukloniti odredbe kojima se propisuje navedena komunalna taksa/naknada i utvrđuje obaveza plaćanja iste, a što se jednako odnosi i na propise koji nisu bili predmet ocjene ustavnosti.

U skladu sa navedenim Mišljenjem Ustavnog suda Federacije Bosne i Hercegovine, od dana objave istog u „Službenim novinama Federacije BiH“, Općinsko vijeće Vogošća je na sjednici održanoj 29.05.2025. godine, donijelo Odluku o stavljanju van snage Odluke o visini komunalnih taksi na području Općine Vogošća, objavljena u („Službenim novinama Kantona Sarajevo“ br. 23/25).

Uvažavajući mišljenje ustavnog suda, kao i odredbe Zakona o komunalnim taksama, nadležna općinska služba je aktivno sudjelovala na radnim sastancima sa drugim jedinicama lokalne samuprave u Kantonu Sarajevo kao i Savezom općina i gradova FBiH, a u cilju pronalaženja adekvatnog načina za primjenu zakonskih odredbi i prava lokalnih zajednica za ostvarivanje prihoda po ovom osnovu, te da se izbjegne mogućnost novih negativnih pravnih posljedica donošenjem podzakonskog akta u lokalnim zajednicama. Iako Skupština Kantona Sarajevo nije izvršila izmjene Zakona o komunalnim taksama, kako je naloženo mišljenjem Ustavnog suda, na inicijativu vijećnika u Općinskom vijeću Vogošća, Služba za privredu, integrisani lokalni razvoj i društvene djelatnosti, pripremila je prijedlog Odluke usklađen sa mišljenjem Ustavnog suda i važećim Zakonima.

FINANSIJSKA SREDSTVA

Za provođenje ove Odluke nisu potrebna finansijska sredstva u Budžetu Općine Vogošća.

